

Na osnovu člana 24. stav 1. p) Ustava Tuzlanskog kantona ("Sl. novine TPK", broj: 7/97 i 3/99. i "Sl. novine TK", broj: 13/99. 10/00. i 14/02), Skupština Tuzlanskog kantona, na prijedlog Vlade Kantona, na sjednici održanoj _____ donosi

Z A K O N

o izmjenama i dopunama Zakona o predškolskom odgoju i obrazovanju

Član 1.

U Zakonu o predškolskom odgoju i obrazovanju («Sl. novine TPK», broj: 8/98) član 8. mijenja se i glasi:

«Osnivač predškolske ustanove obezbjeđuje sredstva potrebna za osnivanje i rad predškolske ustanove u skladu sa Kriterijima za osnivanje i rad predškolske ustanove (u daljem tekstu: Kriteriji), Pedagoškim standardima za predškolski odgoj i obrazovanje (u daljem tekstu: Standardi) i Normativima prostora, opreme i didaktičkih sredstava za ustanove predškolskog odgoja i obrazovanja (u daljem tekstu: Normativi).

Osnivač javne predškolske ustanove osigurava sredstva za:

- plaće, naknade i nagrade zaposlenika ustanove,
- stručno usavršavanje zaposlenika ustanove,
- materijalne troškove,
- održavanje objekta ustanove,
- nabavku, opreme i učila.

Kriterije, Standarde i Normative iz stava 1 ovog člana, donosi ministar obrazovanja, nauke, kulture i sporta (u daljem tekstu: ministar) na prijedlog Pedagoškog zavoda.»

Član 2.

U članu 38. iza stava 3 dodaje se novi stav 4 koji glasi:

«Sastav upravnog odbora mora odražavati nacionalnu strukturu korisnika usluga, osoblja predškolske ustanove i lokalne zajednice.»

Stav 4 postaje stav 5.

Iza stava 5 dodaje se novi stav 6 koji glasi:

«Vršenje dužnosti predsjednika i člana upravnog odbora je dobrovoljno i bez naknade.»

Dosadašnji stav 5 postaje stav 7.

Član 3.

U članu 62. tačka 1. se mijenja i glasi:

«-Kriterije, Standarde i Normative (član 8. ovog Zakona);

Član 4.

Ovaj Zakon stupa na snagu osmog dana od dana objavljivanja u «Službenim novinama Tuzlanskog kantona».

BOSNA I HERCEGOVINA
Federacija Bosne i Hercegovine
TUZLANSKI KANTON
SKUPŠTINA

PREDSJEDNIK

Amir Fazlić

Broj: _____

Tuzla, _____

O B R A Z L O Ž E N J E

uz Zakon o izmjenama i dopunama Zakona o predškolskom odgoju i obrazovanju

I - PRAVNI OSNOV

Pravni osnov za donošenja Zakona o izmjenama i dopunama Zakona o predškolskom odgoju i obrazovanju u Tuzli sadržan je u poglavlju IV 2. član 24. c), a u vezi sa poglavljem III član 11.c) Ustava Tuzlansko-podrinjskog kantona ("Službene novine Tuzlansko-podrinjskog kantona", broj: 7/97. i 3/99), kojima je utvrđeno da Skupština Kantona donosi Zakone i ostale propise neophodne za izvršavanje nadležnosti Kantona, i da je Kanton posebno nadležan za "utvrđivanje i provođenje politike obrazovanja i vaspitanja".

II - RAZLOZI ZA DONOŠENJE ZAKONA

Odredbe člana 8. Zakona o predškolskom odgoju i obrazovanju Tuzlanskog kantona nisu jasno definisale finansiranje rada Javnih predškolskih ustanova od strane osnivača, shodno propisanim Normativima i Standardima za ovu oblast.

Zbog nedovoljnog izdvajanja sredstava za obavljanje osnovne djelatnosti predškolskih ustanova od strane osnivača, predškolske ustanove na području Tuzlanskog kantona dovedene su u tešku finansijsku situaciju i mnogim prijeti obustavljanje rada i njihovo gašenje. Teška materijalna situacija u kojoj se nalaze ustanove utiče na smanjenje obuhvata djece institucionalnim predškolskim odgojem i obrazovanjem (prije rata na Tuzlanskom kantonu procenat obuhvata je bio 12% ukupne populacije djece, a sada je obuhvat oko 4,5% iste). Povećanjem cijena usluga predškolske ustanove postaju privilegija djece bogatih roditelja a što je u suprotnosti sa reformskim zahtjevima i Konvencijom o pravima djeteta UN-a.

Cijene usluga boravka djece u predškolskoj ustanovi se trebaju snižavati i usklađivati s zakonskim odredbama tj. roditelji djece korisnici usluga trebaju plaćati ishranu djece i specijalizirane programe (što do sada nije slučaj), a time bi se kapaciteti predškolskih ustanova popunili i povećao obuhvat djece predškolskim odgojem i obrazovanjem.

Djeci roditelja koji primaju razna socijalna davanja pod jednakim uslovima treba omogućiti pristup ovom stupnju odgoja i obrazovanja (eliminacija diskriminatorskog odnosa prema djeci).

Namjera je da se izmjenama Zakona precizira obaveza osnivača da finansira rad predškolskih ustanova, snizi cijena za korisnike usluga i time stvori mogućnost postepenog povećanja obuhvata djece institucionalnim predškolskim odgojem i obrazovanjem shodno obećanju broj 2 iz reforme obrazovanja.

Da bi imali uvid u finansiranje javnih ustanova predškolskog odgoja i obrazovanja od strane općina, kao osnivača, uz obrazloženje dostavljamo Pregled finansiranja javnih ustanova predškolskog odgoja i obrazovanja u 2003. godini, prema podacima dostavljenim od strane predškolskih ustanova, kao njegov sastavni dio.

III - OBRAZLOŽENJE PRAVNIH RJEŠENJA

U članu 1. ovog Zakona preciznije se utvrđuju obaveze osnivača da obezbjeđuje sredstva potrebna za osnivanje i rad predškolske ustanove. Sredstva potrebna za osnivanje i rad predškolske ustanove obezbjeđuju u skladu sa ovim Zakonom i Kriterijima, Standardima i Normativima koje donosi ministar obrazovanja, nauke, kulture i sporta.

U članu 2. usklađen je sastav Upravnog odbora sa odredbama Okvirnog Zakona o osnovnom i srednjem obrazovanju u Bosni i Hercegovini.

Skupština Tuzlanskog kantona je na sjednici 29.01.2004. godine utvrdila Nacrt Zakona o izmjenama i dopunama zakona o predškolskom odgoju i obrazovanja i uputila ga na javnu raspravu u trajanju od 30 dana.

Po okončanju javne rasprave dana 15.03.2004. godine održan je Okrugli sto na kojem su sumirani rezultati javne rasprave, tako da je utvrđen tekst Prijedloga Zakona.

Izvještaj o provedenoj javnoj raspravi je sastavni dio ovog obrazloženja.

VLADA TUZLANSKOG KANTONA